

## CONVENIO DE COLABORACIÓN EMPRESARIAL ENTRE LA AXENCIA GALEGA PARA A XESTIÓN DO COÑECEMENTO EN SAÚDE Y GALAPAGOS BIOPHARMA SPAIN, S.L.U. PARA LA JORNADA PRESENTACIÓN DEL NUEVO MODELO DE HISTORIA CLINICA ELECTRÓNICA

### MEMORIA XUSTIFICATIVA

A xerente do Servizo Galego de Saúde, **DECLARA:**

Que a Axencia Galega para a Xestión do Coñecemento en Saúde e a empresa biofarmacéutica Galápagos Biopharma Spain, S.L.U. asinaron o 02.12.2022 o convenio arriba referido. O convenio estivo vixente dende a súa sinatura ata a realización completa do seu obxecto no mes de decembro de 2022.

Que o instrumento convencional tiña por obxecto establecer os termos e condicións para a realización da actividade formativa descrita no anexo do dito convenio por parte da Axencia Galega para a Xestión do Coñecemento en Saúde. Actividade consistente na presentación do novo modelo de historia clínica electrónica do Servizo Galego de Saúde.

Que existe converxencia de intereses entre as entidades asinantes en orden á consecución do obxecto referido.

Que o convenio fundamentouse no seguinte:

Mediante o Decreto 112/2015, do 31 de xullo, créase a Axencia Galega para a Xestión do Coñecemento en Saúde (ACIS) e apróbanse os seus estatutos. A posta en funcionamento efectivo da Axencia tivo lugar o 1 de xaneiro de 2016, coa entrada en vigor dos orzamentos xerais da Comunidade Autónoma de Galicia.

Entre os obxectivos estratéxicos de ACIS están o de elaborar a planificación en materia de docencia, formación, investigación, innovación e avaliación de tecnoloxías e servizos sanitarios, en función dos criterios e obxectivos de planificación estratéxica definidos polo Servizo Galego de Saúde e pola Consellería de Sanidade e o de xestionar o coñecemento no sistema público de saúde de Galicia.

Segundo o artigo 42 dos seus estatutos, para o cumprimento dos seus obxectivos ACIS poderá contar, entre outros, con recursos procedentes de achegas voluntarias, doazóns, herdanzas, legados e demais achegas a título gratuito de entidades privadas e de particulares.

A Lei 49/2002, do 23 de decembro, de réxime fiscal das entidades sen fins lucrativos e dos incentivos fiscais ao mecenado regula determinados beneficios fiscais que poden aplicarse as persoas físicas ou xurídicas que colaboren no financiamento de actividades daquelas entidades que poidan ser beneficiarias do mecenado.

O artigo 16 da Lei 49/2002 declara como entidades beneficiarias do mecenado ao Estado, as Comunidades Autónomas e as Entidades Locais, así como os Organismos Autónomos do Estado e as entidades autónomas de carácter análogo das Comunidades Autónomas e das Entidades Locais. En consecuencia, ACIS pode ser receptora de achegas económicas que dean dereito aos aportantes a obter beneficios fiscais dos regulados na Lei 49/2002.

Segundo o Artigo 25 da Lei 49/2002, entenderase como convenio de colaboración empresarial en actividades de interese xeral aquel polo cal as entidades ás que se refire o artigo 16, a cambio dunha axuda económica para a realización das actividades efectuadas en cumprimento do seu obxecto ou finalidade específica, comprométese por escrito a difundir, por calquera medio, a participación do colaborador nas devanditas actividades. A difusión da participación do colaborador no marco dos convenios de colaboración empresarial non constitúe unha prestación de servizos.

Na ACIS estimouse oportuno realizar unha xornada técnica para a presentación do novo modelo de Historia Clínica Electrónica, tendo en conta que a sanidade pública afronta o reto de abordar unha transformación do modelo asistencial e de prevención da saúde, e non será posible sen acometer unha profunda transformación dixital nos sistemas sanitarios.

A historia clínica electrónica identifícase como pilar fundamental deste proceso de transformación. Deste xeito, a actividade obxecto do devandito convenio, consistiu no desenvolvemento dunha xornada, incluíndo tamén a realización e gravación dos contidos expostos, na que se trataron temas coma os retos da transformación dixital da saúde no ámbito nacional, a integración de elementos dixitais na historia electrónica ou o novo modelo de historia clínica electrónica de Galicia.

Galápagos Biopharma Spain, S.L.U. é unha empresa biofarmacéutica especializada na investigación, desenvolvemento e comercialización de medicamentos con novos mecanismos de acción para múltiples enfermidades, e está interesada en colaborar en proxectos relacionados coa asistencia sanitaria, a investigación, a docencia e a asistencia social, polo que considerou oportuno colaborar coa actividade organizada pola ACIS.

Para a realización da dita actividade, Galápagos Biopharma Spain, S.L.U. comprometeuse a través do devandito convenio á achega á ACIS de sete mil cincocentos euros (7.500,00 €).



Os intereses converxentes das partes asinantes exclúen o ánimo de lucro, e non podían satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estimouse xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago,

